

"Dikotwana tsa meriri" di fumanwe e le ho hong ho sebedisetswang ho etsa Mandrax

Tshwane, 7 Tshitwe 2022 – Bahlanka ba Bolaodi ba Meedi ba Ditshebeletso tsa Lekgetho tsa Afrika Borwa (SARS) ba hapile ho hong ho sebedisetswang ho etsa sethethefatsi sa Mandrax ka mora ho lekola teraka e neng e kena ka Afrika Borwa ho tswa Mozambique.

Bahlahlobi ba Bolaodi ba Meedi ho tswa Yuniting ya Dintja tse Fofonelang mane Lebombo ba ne ba ntse ba iketsetsa tekolo ya bona ya tlwaelo ya merwalo kanaleng ya dithomello ka hare ho naha mane ledibohong la Lebombo ha ba tla emisa teraka e tshehla e neng e hula ditreilara tse pedi tse neng di lebile mona Afrika Borwa.

Bahlanka bana ba ile ba buisana le mokganni, e leng moahi wa Zimbabwe, hore ba tle ba etse tekolo ya sebele ho nnetefatsa hore dithoto tsena tse tsebahaditsweng, e feela e le tsona tse ka hara mabokose a dikotwana tsa meriri. Mohlanka wa Bolaodi ba Meedi o ile a kopa ditokomane tsa tsebahatso ho tswa mokganning enwa mme yena a di nyehela ho mohlanka enwa.

Dinomoro tsa dikwahedi di ile tsa nnetefatswa mme ha fumanwa hore e feela e le tse nepahetseng, mme mohlalobi a tswela pele ka ho phenya ha hae sepalangweng sena kaofela ha sona. Ho ile ha bulwa lebokose la dithuluse mme ha fumanwa mekotla e 9 ya boima ba 22kg e tshetse phoshwana e sa tsejweng. Phoshwana ena e ile ya etswa diteko ka ho sebedisa se bitswang *Generic and Cocaine test kit* mme ha fumanwa hore e kentse dithethefatsi tse fetolang semelo.

Dithoto tsena le sepalangwang di ile tsa nyehelwa diatleng tsa Ditshebeletso tsa Sepolesa sa Afrika Borwa (SAPS) ho etsa diphuputso tse ding. Hamoraonyana, Laboratori ya SAPS ya Forensiki e ile ya tiisa hore ntho eo ke *N-Acetylanthralinic Acid* e hlokehang ha ho etswa *Methaqualone* (Mandrax).

Boleng bo akantsweng ba sena se fumanweng ke tjelete e kana ka R5-million. Le ha ho le jwalo, hang feela ha phoshwana e sebedisitswe ho etsa dipilisi tsa Mandrax, sethethefatsi sena se tla ba le boleng bo boholo haholo. Mokganni wa teraka o ile a baleha ka nako ya tekolo ya sena, mme sepalangwang sona se ile sa nyehelwa ho SAPS hore ho etswe diphuputso tse ding. Sepalangwang sena se hapilwe mme se mane Polokelong ya Mmuso ya SARS.

- Ketsahalong e nngwe e ka thoko e mane ledibohong la Skilpadshek mane Botswana, mohlanka wa Bolaodi ba Meedi wa SARS o ile a kgaoletsa teraka e ngodisitsweng mona Afrika Borwa e neng e kentse makase a sehlooho a neng a sa tsebahatswa, a belaelwang e le a seng molaong a disakarete tsa *Remington Gold*.

Dikahare tsa teraka di ne di tsebahaditswe e le pampiri e lahlwang ya boleng ba R48 500. Ka nako ya tekolo, mohlanka wa Bolaodi ba Meedi o ile a fumana hore pampiri ena e lahlwang e ne e se e sebediseditswe ho pata makase a sehlooho a disakarete. Boleng ba disakarete tsena bo akanngwa ho ba R21 -million.

Mokganni enwa wa teraka o ile a iketsa eka o bula lehlakore le leng la teraka athe o tshola tlhako morong ho tswa ka lepatlelo lena la tekolo. Teraka ena le makase a sehlooho a disakarete a ile a hapuwa mme a mane ledibohong la Skilpadshek. Ho butswa nyewe ya bonokwane kgahlano le mokganni, akgente e hlekelang mmoho le khampani ya dipalangwang.

Khomishenara ya SARS Edward Kieswetter o thoholeditse bahlanka ba Bolaodi ba Meedi le DDU ka phadimeho ya bona ya ho thibela disakarete tse seng molaong ho kena ka hara naha. “Indasteri e molaong ya kwae le disakarete naheng e hloka ho tsehetswa mme SARS e bontshitse hape hore e kgatha tema ya yona. “Ka mokgwa o tshwanang, kgwebisano ya dithethefatsi tse fetolang semelo e lokela ho fediswa. Dithethefatsi tsena di na le ditlamorao tse mpe hodima basebedisi ba tsona, bao ka bomadimade ba akaretsang batjha ba nang le bokgoni ba ho ba le kabelo e kgolo katlehong ya naha ya rona.”

Mong. Kieswetter o tlatsitse ka hore SARS e lomahantse meno ho phethahatsa se bolelwang ke maikemisetso a mawala a ho thafalletsa le ho etsa hore ditjeo e be tse hodimo bakeng sa motho ofe kapa ofe ya tlolang molao. “Le ha re entse hore boikobelo bo be bonolo, re keke ra mamella dinokwane le maqulwana a hlophisitsweng a dinokwane bao sepheo sa bona e leng ho nonyetsa katleho ya ikonometri ya naha ya rona mmoho le bophelo bo botle ba baahi ba rona”.

Boha ditshwantsho tsena tse ka tlase mona tsa mekotla e kentseng sena se bitswang
N-Acetylanthralinic Acid



Ho fumana lesedi le fetang lena, ikopanye le SarsMedia@sars.gov.za